

Seludup dadah bernilai RM6.2 juta guna sampan

Dirampas dalam operasi khas di Kuala Perlis

Oleh SITI ZUBAIDAH ZAKARAYA
PERLIS

Cubaan menyeludup bunga ganja bernilai lebih RM6 juta menggunakan sampan berjaya digagalkan dalam satu operasi khas di perairan Kuala Perlis di sini pada 13 Oktober lalu.

Pengarah Jabatan Kastam Diraja Malaysia (JKDM) Kedah, Wan Marini Wan Hamzah, berkata serbuan jam 10 malam dilakukan hasil risikan pihaknya dengan kerjasama Unit Penguatkuasaan Marin Langkawi bersama pasukan elit COBRA.

Menurutnya, sepasukan anggota yang menjalankan pemantauan menemui sebuah sampan dalam keadaan mencurigakan di tambak pesisiran pantai.

"Hasil pemeriksaan menemukan empat guni bertulisan Thailand. Pemeriksaan lanjut membawa kepada penemuan bahan disyaki dadah jenis bunga ganja dengan anggaran berat keseluruhan 67.48 kilogram (kg).

"Nilai rampasan dianggarkan mencecah RM6,209,816," katanya dalam satu kenyataan pada Selasa.

Beliau berkata, sindiket dipercayai menggunakan sampan dari negara jiran untuk mendaratkan dadah di lokasi ter-



Yahaya melihat rampasan dadah disyaki bunga ganja ketika sidang akhbar di IPK Pahang pada Selasa.

pencil bagi mengelak dikesan pihak berkuasa.

"Kes disiasat mengikut Seksyen 39B Akta Dadah Berbahaya 1952," ujarnya.

Sementara itu di **PAHANG**, polis merampas dadah jenis ganja dan bunga ganja bernilai RM5.34 juta dalam dua operasi berasingan di Bentong dan Maran, awal bulan ini.

Ketua Polis Pahang, Datuk Seri Yahaya Othman berkata, dalam operasi pertama pada 4 November lalu di Bentong, polis menerima maklumat sebuah kenderaan jenis Toyota Camry diparkir dalam keadaan mencurigakan di tapak projek Laluan Rel Pantai Timur (ECRL), Jalan Lama Bentong ke Bukit Tinggi.

"Pemeriksaan menemukan 240 bungkusan plastik lut sinar disyaki ganja seberat 140.4kg.

"Namun, tiada pemandu atau penumpang di lokasi," katanya di Ibu Pejabat Polis Kontinjen (IPK) Pahang pada Selasa.

Yahaya berkata, semakan mendapati kenderaan didaftarkan atas nama seorang lelaki dari Johor.

"Dalam kes kedua pada 6 November, seorang lelaki berusia 37 tahun ditahan di kawasan Rehat dan Rawat (R&R) Maran pada 6 November lalu.

"Pemeriksaan terhadap kenderaan jenis Perodua Ativa menemukan kira-kira 98kg dadah disyaki bunga ganja.

"Suspek mengaku menerima upah antara RM2,000 hingga RM3,000 bagi setiap penghantaran," katanya.

Mahkamah & Jenayah